

Plevon Francestg Eduard Muoth

Autor(en): **Venzin, B.**

Objekttyp: **Obituary**

Zeitschrift: **Annalas da la Societad Retorumantscha**

Band (Jahr): **44 (1930)**

PDF erstellt am: **06.08.2024**

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.


Plevon Francestg Eduard Muoth †

da B. VENZIN.

Ell'umbriva della idilica baselgia franciscana de Danis ruaussan las restonzas terrestras din bien e sincer amitg de nies pievel romontsch, de plevon Francestg Eduard Muoth. El ei morts a Tavanasa ils 3 de mars 1929. In pievelun ha cum-pignau sia bara tiel pitoresc santeri, seregurdond cun engrazieivladad dils benefecis, ch'il cor niebel dil generus plevon ha spendiu el decuors d'ina liunga veta. Sur Muoth ei staus in fideivel amitg e fautur della caussa romontscha, in prezieu collaboratur dellas „Annalas“, e mereta sin questas paginas dus plaids de pia memoria.

Naschius a Tavanasa ils 22 de fevrer 1857, ha Eduard suenter la prematura mort de ses geniturs anflau ina secunda casa paterna tier siu augsegner de Breil, sur canoni Bistgaun Darms, in frar de sia mumma. Da quel ha il giuven Eduard retschert ina solida educaziun e bia stimulaziun spirtala, che ha mussau ad el la via tier la clamada e tras la veta. In summa haveva Sur Eduard en bia risguards semegledetgna, cul spirtus ed original canoni de Breil, che ha pastorau leu 1846 entochen 1896. Ses studis gimnasials ha el fatg a Muster e Sviz, la filosofia a Friburg e la teologia a Monza-Milaun. 1881-83 eis el staus caplon a Breil, 1883-85 plevon a Surrhein, 1885-97 plevon a Sedrun, 1897-1905 caplon a Selva, 1905-11 plevon a Dardin, 1911-24 plevon a Pigniu, 1924-28 beneficiat a Nossadunna, Trun. Il davos onn ha el priu dimora tier siu frar a Tavanasa, per spetgar cun edificonta fidonza sil clom dil Segner tier la veta perpetna.

Sur Eduard Muoth era in um niebel, grad e sincer, in character ded aur. Pli amitg della retratgadat che della rueida dil mund ha el mai encuretg de sefultscher davontier, mobein de far sia obligaziun e de spender benefecis el zupau. Tgi che enconuscheva pli datier il humiliteivel plevon, sesmervegliava de sia vasta savida, buca mo en la teologia, mobein era en



Plevon Francestg Eduard Muoth

auters roms della scienza. Sper las lavurs de clamada ei il defunct adina s'occupaus cul studi della natira. Sias enconuschientschas ella historia naturala havessen fatg tutta honor ad in professor. Ses studis botanics havevan dasperas in intent practic, numnadamein il diever dellas jarvas medicinalas per bien dils paupers malsauns. Cun studi ed experientscha veva el aquistau considerablas enconuschientschas en fatgs de medeschina ed ha prestau nundumbreivels survetschs als malsauns en vitgs ed ucclauns isolai, dals temps senza viafier, auto e cassa de malsauns. Denton ha Sur Muoth buca udiu tier quels, che vulan curar tuttas malsognas e sclauder il miedi de clamada. El ha mai fatg reclama cun sia savida, siu princepi era: far dil bien nua ch'ins sa, sco sche quei se capess da sesez.

Sia recreaziun encureva el medemamein ella natira, specialmein sper ses aviuls, ils quals han stimulau el tier entginas bialas poesias. Per encunter gidavan ei suenter empau la magra parvenda. Mintgamai il settember bugleva tras sias aveinas il saung de catschadur ed el traversava alps ed uauls cun pli u meins buna fortuna. Sco ei para era il catschadur denton bein schi versaus ella teoria della catscha ed ella biologia della selvaschina, che ella practica, al qual factum el ha dau ina expressiun humoristica ella poesia: „Alla catscha.“

Tut speciala menziun mereta en quest liug igl operar de sur Muoth en favur dil romontsch, sia cultura e literatura. El era in um de tempra romontscha tras a tras. Adina plidava el in romontsch correct, buca mo sin scantschalla ed en scola, era ella conversaziun evitava el scadin germanismus e turziava la negligientscha cunzun dils studegiai en quels risguards. Sur Muoth haveva ina buna aveina poetica, che vegneva nutrida dad in fin sentir per las bellezias e pils misteris della natira. La pli gronda part della poesia, ch'el ha publicau, ha sia ragisch ella natira. Vers e remas van beinduras empau a pei-ziép, mo sia viarva ei originala, genuina, reha en bunas expressiuns romontschas. Nus numnein mo ils biars buns nums romontschs per plontas, flurs ed jarvas, che secattan en siu poem: „El reginavel della flora.“ Las „Annalas“ de 1899 portan las empremas poesias de sur Muoth. Las megleras ein

bein: „La posta“ ed „Ei schaumna“. L'annada 1905 contegn las duas interessantas balladas: „Disput dils utschals“ e „Dertgira dils animals“. En diesch annadas suonda il pli lung poem: „El reginavel della Flora“, el qual il poet ha rimnau in abuldont material scientific, medicinal e folcloristic. Ils caporepresentants della flora passan si en veta dramatica, el vestgiu della detga e praula, en personificaziun veramein originala, pumera, flurs ed jarvas en tschontscha e comparsa propi caratteristica ed interessanta. Tras tut spirescha odor poetica e forza de composiziun. Donn, ch' il lungatg empau de grev cuviera bia bellezias poeticas. Igl ei de deplorar, ch' il poet ha buca redigiu en prosa il grond diember de detgas e praulas ch' el enconuscheva ord la fauna e flora e ch' el ha per part applicau el sura poem. Quei vess dau in'ovra preciosa per nossa literatura ed havess spindrau in custeivel material folcloristic, ch' ei per la pli gronda part gia svanius ord la poesia nunscretta de nies pievel romontsch. Bein il megler product ord la plema de sur Muoth ei siu drama nunpublicau sur il grond herox d'uiara: Suworof. Duront ses onns de Pigniu ha igl autur fatg considerabels studis historics per quella lavur, che representa il renomau til dell'armada russa d'avon 130 onns sur quater stentus pass svizzers tochen a Pigniu. Il lungatg ei pli populars, ch' en las poesias, denteren bellezza scenas de vera forza dramatica. L'entira composiziun ei denton ualti complicada, il drama ei bein pli adattaus per la lectura, che per la representaziun. L'uniun dramatica de Breil ha produciu il toc cun bien succes igl onn 1921 ed igl autur ha silsuenter redigiu da niev il drama e nus vein speranza che las „Annalas“ vegnien els proxims onns a publicar el, gia muort sia valeta instructiva per la historia de nossa tiara. ... Sur Muoth ha era mess sia plema en survetsch della canzun religiosa, la quala el ha adina cultivau cun premura e bien gust.

Nus lein buca pretender, che la lavur literara de sur Muoth seigi de valor cuzzeivla; pli gronds ch' el ston far quen de curdar en emblidanza. Mo quei che duei restar a nus dal preziau defunct, quei ei il spert ded in ver e sincer romontsch, quei ei l'ardenta amur per nies pievel e ses beins ideals, quei ei la memoria d'in bien e niebel carstgaun.